

ventre de sa mere iusques au temps ordonné? & qu'il a trouué le chemin d'en sortir? est-ce parce que Dieu le fait mourir & resusciter quand bon luy semble? Il ne fait pas ce que Dieu commande, & ne considere pas les biens qui le nourrissent: Nous auons enuoyé la pluye, nous auons ouuert les tresors de la Terre, nous auons fait produire toute sorte de grains, des blettes, des oliues, des dattes, des iardins, & des vergers remplis de fruiçts & d'herbages, pour nourrir vous & vos troupeaux. Lors que l'Ange sonnera la trompette la seconde fois, l'homme fuyra son frere, sa mere, sa femme, & ses enfans, chacun pensera à soy-mesme, ce iour les meschans auront le visage couuert d'affliction; le visage des bons sera ioyeux, & ceux qui ont cherché vn chemin entre la foy & l'impieté, auront le visage couuert de terre & de poussiere.

*LE CHAPITRE DE LA RON-
deur, contenant vingt-neuf versets,
escriit à la Meque.*

AV nom de Dieu clement & misericordieux. Lors que la rondeur du Soleil paroistra, que les estoiles tomberont, que les montagnes marcheront, que les chameaux seront sans charge & sans pasteur, que les animaux seront assemblez, que la mer sera couuerte de feu, que les ames retourneront dans les

corps, que la fille demandera pourquoy on la fait mourir que le liure du bien & du mal s'ouurira, que le Ciel se despoüillera, que le feu d'Enfer paroistra, que le Paradis s'ouurira. Alors les ames sçauront le bien & le mal qu'elles auront fait. Le iure par les planettes, par l'obscurité de la nuit & par la clairté du iour, que les paroles de l'Alcoran sont les paroles du Prophete aymé de Dieu, puissant auprès de sa diuine Majesté; vous luy devez obeyr, il est tres-fidelle obseruateur de ce qui luy est commandé, il n'est pas demoniacle comme vous auez estimé, il a veu l'Ange clairement & sans enigme, & n'est pas en peine du futur, les paroles de l'Alcoran ne sont pas les paroles du Diable, de quel costé que vous vous tourniez, il n'est que pour instruire le peuple, & ceux d'entre vous qui voudront suiure le droit chemin, mais vous n'aurez pas la volonté de le suiure s'il ne plaist à Dieu Seigneur del'Vniuers.

Les Arabes enseignoient leurs filles toutes viues, lors qu'elles auoient fait mal.

LE CHAPITRE DE L'OVERTURE

*du Ciel, contenant dix-sept versets,
écrit à la Meque.*

AV nom de Dieu clement & misericordieux. Les ames cognoistront le bien & le mal qu'elles auront fait lors que le Ciel s'ouurira, que les estoiles tomberont, que les mers s'assembleront, & que les tombeaux s'ouuriront. O homme! qui te rend si su-